



Medidas en materia tributaria e recadatoria para minimizar os efectos da situación xerada polo Coronavirus (COVID19) neste 2020

Coa finalidade de clarificar as distintas situacións nas que se pode atopar a cidadanía en relación cos procedementos tributarios e recadatorios e, polo tanto, de dotar de seguridade xurídica e transparencia ás regras e procedementos a seguir, fanse públicos os criterios que rixen nos supostos de:

1. Presentación de declaracións e autoliquidacións.
2. Presentación de documentación requirida.
3. Pagamento de débedas xa notificadas ou de fraccionamentos xa concedidos antes do 18 de marzo.
4. Pagamento de débedas que se notifiquen ou se entendan notificadas a partir do 18 de marzo.
5. Pagamento do Imposto sobre Vehículos.
6. Procedementos de comprobación xa iniciados.
7. Interposición de recursos.
8. Actuacións no procedemento económico-administrativo

1.- Presentación de declaracións e autoliquidacións.

1.1.- Autoliquidacións con data límite de pagamento anterior ao 14 de marzo de 2020, poderán ingresarse até o 30 de abril de 2020.

1.2.- Autoliquidacións con data límite de pagamento posterior ao 14 de marzo de 2020 e anterior ao 20 de maio de 2020, poderán ingresarse até o 20 de maio de 2020.

1.3.- As restantes autoliquidacións dos tributos municipais realizaranse nos prazos que fixan as ordenanzas fiscais municipais, accesibles en:

https://sede.vigo.org/expedientes/sede_textos/texto.jsp?id=concellodixital11&lang=ga

1.4.- En relación ao Imposto sobre incremento de valor dos terreos de natureza urbana (Plusvalía), **deberán presentar documentación** na sede electrónica vigo.org ou no enderezo ofi.plusvalias@vigo.org

O prazo de declaración para os negocios xurídicos intervivos é de 3 meses e para os negocios xurídicos mortis causa é de 1 ano.

Non obstante o anterior, debe terse en conta que aquelas declaracións cuxo prazo tivese rematado o día 14 de marzo, amplíase dito prazo até o 30 de abril.

1.5.- Para ingresar autoliquidacións sen ter que desprazarse as entidades bancarias, poderán realizar transferencia electrónica na conta do Concello de Vigo, IBAN ES48 2080 5000 6331 1007 0132, indicando como “concepto” o número de xustificante (13 díxitos) e “número de expediente”.

2.- Documentación esixida por un requirimento recibido antes do 18 de marzo de 2020.

2.1.- O prazo para atender o requirimento esténdese até o 30 de abril de 2020 ou a data na que termine unha eventual prórroga do estado de alarma.

2.2.- O prazo para cumprimentar o trámite de alegacións esténdese até o 30 de abril de 2020 ou a data na que termine unha eventual prórroga do estado de alarma.

2.3.- O prazo para cumprimentar o trámite de audiencia esténdese até o 30 de abril de 2020 ou a data na que termine unha eventual prórroga do estado de alarma.

3.- Pagamento de débedas xa notificadas ou de fraccionamentos xa concedidos antes do 18 de marzo.

a) Liquidacións tributarias.

Se a Administración notificou unha liquidación tributaria antes do 18 de marzo e o prazo de ingreso en período voluntario vence entre o 18 de marzo e o 30 de abril de 2020, o prazo de pagamento en período voluntario esténdese **até o 5 de maio de 2020.**

b) Derivacións de responsabilidade de débedas tributarias.

Se a Administración notificou un acordo de declaración de responsabilidade tributaria antes do 18 de marzo de 2020 e o prazo de ingreso en período voluntario vence entre o 18 de marzo e o 30 de abril de 2020, o prazo de pagamento en período voluntario esténdese **até o 5 de maio de 2020.**

c) Providencia de prema.

Se a Administración notificou unha providencia de prema con anterioridade ao 18 de marzo e o prazo de ingreso en período executivo vence entre o 18 de marzo e o 30 de abril de 2020, o prazo de pagamento en período executivo estenderase **até o 5 de maio.**

d) Pagamento da fracción ou da cantidade aprazada que debía realizarse entre o 18 de marzo e o 30 de abril.

Todos os vencementos que se deben ingresar entre o 18 de marzo e o 30 de abril de 2020 trasládanse á data de **5 de maio**, sen incremento da súa contía.

e) Inadmisión de solicitudes de fraccionamento, adiamento e compensacións anteriores a 18 de marzo.

Se o prazo reflectido na providencia de prema á que fai referencia o artigo 62.5 da Lei Xeral Tributaria, non concluíu á data de 18 de marzo, o prazo de ingreso para aboar a débeda coa recarga de prema reducida do 10 por cento, amplíase **até o 5 de maio**.

f) Sobre as retencións ou trabas feitas nos saldos das contas bancarias.

Os prazos que regula o RD-lei 8/2020, do 18 de marzo para atender aos requirimentos, dilixencias de embargo e solicitudes de información con transcendencia tributaria que non tivesen concluído a 18 de marzo, ampliáranse até o **30 de abril de 2020**.

Aos efectos de unificar prazos e axustalos ao previsto no artigo 62 da Lei Xeral Tributaria, os procedementos de retención que regula o artigo 171 da LXT e 79 do Regulamento Xeral de Recadación, que terían que ser ingresados na Tesourería Municipal unha vez transcorridos 20 días naturais dende o día seguinte á data da traba, cuxo prazo de traba remate entre o 18 de marzo e o 30 de abril, ampliáanse **até o 5 de maio**.

No devandito prazo poden os interesados presentar, se fose o caso, as reclamacións ante a administración, e esta dar instrucións á entidade financeira para levantar a traba se concorresen as circunstancias legais.

4. Pagamento de débedas que se notifiquen ou se entendan notificadas a partir do 18 de marzo.

a) En período voluntario. O prazo de pagamento estenderase até o **20 de maio de 2020**, salvo que o outorgado pola norma xeral sexa maior; nese caso será este o que resulte de aplicación.

b) En período executivo. O prazo de pagamento estenderase até o **20 maio de 2020**, salvo que o outorgado pola norma xeral sexa maior; nese caso será este o que resulte de aplicación.

c) Fraccionamentos ou adiamentos. Todos os vencementos de pagamento anteriores ao día **20 de maio** trasládanse a esta última data, sen incremento da súa contía.

5.- Pagamento do Imposto de Vehículos (Padrón de vehículos)

a) O calendario do contribuínte que figura na sede electrónica fixa o prazo de inicio de cobranza deste tributo o 1 de abril e o remate o 5 de xuño.

https://sede.vigo.org/expedientes/sede_textos/texto.jsp?id=concellodixital3&lang=gal

b) Novo prazo que substitúe ao anterior.

Apróbase un cambio no calendario, pasando o inicio da cobranza ao **4 de maio** e remate ao **6 de xullo de 2020**.

6.- Procedementos de comprobación xa iniciados.

Suspéndense os prazos de atención a requirimentos, presentación de alegacións, audiencia e outros relacionados con procedementos de verificación de datos, comprobacións limitadas, comprobación de valores e de inspección tributaria **até o 30 de abril** ou, no seu caso, á data na que termine a eventual prórroga do estado de alarma.

7.- Prazo de interposición de recursos contra as Resolucións da Concillería de Facenda.

Fíxase o día **1 de maio de 2020 como data de inicio do prazo** para interpor recursos ou data determinada pola norma xeral se a notificación do acto a recorrer se producira con posterioridade ao 30 de abril de 2020.

Se a administración notificou un acto ou resolución antes do 14 de marzo de 2020 (data de entrada en vigor do Real Decreto 463/2020, polo que se declara o estado de alarma para a xestión da situación de crise sanitaria ocasionada polo COVID-19), e o prazo de recurso ou reclamación non finalizara á entrada en vigor do devandito Real Decreto, o prazo de interposición é dun mes, **que se iniciará de novo o día 1 de maio de 2020** ou ben o día seguinte ao que perdan vixencia as posibles prórrogas do Real Decreto 463/2020, no caso de que ese día fose posterior ao 1 de maio.

8. Prazos no procedemento económico-administrativo

O prazo para a interposición de reclamación económico-administrativa contra resolucións referidas a actos tributarios non firmes á data da declaración do estado de alarma ou resoltos ou notificados no dito prazo será **dun mes a contar dende o día seguinte á data de remate do dito estado de alarma.**

Os prazos para a realización de trámites perante o Tribunal Económico-Administrativo do Concello de Vigo, tanto no suposto de aqueles xa iniciados e non vencidos na data da declaración do estado de alarma coma os que se notifiquen durante a vixencia deste, se reanudan non só na súa parte pendente, senón na súa integridade, ós dez días da finalización do devandito estado de alarma.

As anteriores circunstancias serán indicadas en cantos actos de trámite ou resolutorios sexan efectuados polo Tribunal e/ou os seus membros na vixencia do estado de alarma.

Vigo, 23 de marzo de 2020